



Ngoenzhaenx, ndit raeuj rumz liengz, daxboh daiq gou bae lajmbanj mbaet ndaej haujlai byaekcaxcin. Daxboh naeuz louz mbanj he gag gwn, lw roengz haenx heuh gou dawz daengz bakloh cibcih bae gai, dangguh sevei sizcen.

Gou daeujdaengz bakloh henz dan byaek he, youq gwnz dieg bu ndei daehsuli, baij hwnj byaekcaxcin, couh caj bouxcawx daeuj cawx.

“Dahniq, mwngz dwg baez daih-

it gai byaek ba?” Boux daxheiz youq henz gai byaek haenx riunyumj doiq gou naeuz, “gaem gyaekcaxcin baenz-neix iq couh gai 2 maenz, gaem mwngz baenzneix hung, ceiqnoix gai 5 maenz.” Daxheiz dawz gij byaekcaxcin gou cuengq youq gwnz caengh de, youq dauq bingzfaen baez he.

Yaep he, miz boux vunz he cam gou: “Siuj baengzyoux, gij byaekcaxcin neix gaem geijlai cienz?” Gou youh launyaenq youq mbei’iq, yaemh-yaemh ywxywx naeuz: “2 maenz ba……” Daxheiz gai byaek haenx youq henz ciengj dwk naeuz: “Gaem byaek

baenzneix hung, gai 3 maenz ngaenz, lwngyez bin hwnj faex bae mbaet mbouj yungzheih.” Bouxcawx lawq mbat he, naeuz: “Gou 5 maenz cawx song gaem, ndaej mbouj ndaej?” Gou doq ngaek-ngaek gyaauj. Bit seng’eiq daih’it couh mauhgvaq gij liuhsiengj gou, caeklaiq miz daxheiz gai byaek neix.

Mbwn yied daeuj yied hwnqg, byaekcaxcin oiqtet haenx gig vaiq couh reuq lo, boux cawx he yawjyawj le, naeuz mbouj singjsien couh mbouj cawx. Daxheiz naeuz: Mwngz baez wnq daeuj gai byaek, yaek daiq bingz raemx he, gek duenh seizgan he couh

bit baez raemx he, byaek couh ndaej baujiz singjsien lo.” Gangj dwk, de daj dan byaek de dawz bingz raemx he daeuj, bang gou bit raemx hawj byaekcaxcin gou. Gou gamjdoengh dwk mbouj rox gangj gijmaz ndei, couh doiq de naeuz: “Mwngz son gou baenzneix lai, couh dang saehfouh gou ba!” Daxheiz angq dwk riu lo.

Daj baezhaenx gvaqlaeng, gou moix ngoenz baehag cuengqhag ginggvaq gizhaenx, cijaeu yawjraen saefouh gai byaek, gou couh gvaqbae dongx de.

(roek nienzgaep Liuz Gyah)


Gou Caeuq Daxmeh Ciem Habdoengz

我和妈妈签合同

Youq ndaw da daxmeh, gou dwg boux lwngyez hagsib ngaiznyed he. Cuengqhag ma ranz, daxmeh cungj dwg coi gou sij cozyez, lij youq gamduk gou dem.

Miz haemh ndeu, gou gig sinhoj sij sat cozyez, gaenq yaek gouj diemj cung lo. Daxmeh naeuz: “Gvaiz lo, vaiq di ninz lo.” Gou naengh youq mbouj doengh, duix aen’ gyaauj roengz mbouj guh sing. “Siengj hwnjvangj guhcaemz ha?” Daxmeh baez yawj couh yawj rox gij simgei gou. Gou ngaekngaek gyaauj. Daxmeh siengjsiengj le, naeuz: “Yienghneix raeuz ciem faenh habdoengz he ba!” “Habdoengz?” Gou doeksaetyat. “Baezlaeng guh cozyez aeu nyinhcaen guh sat guh ndei, cih yaek sij cingq. Cingzcik gaujsi moix goh cungj yaek ndaej goujicib faen doxhwnj, gou couh hawj mwngz moix ngoenz hwnjvangj buenq diemj cung.” Daxmeh gangj gij vah neix, lumjbaenz caeux couh naemj gvaq lo. Gou yaepyaep da naemjnaemj le, roxnyinh habsuenq, couh doengzeiq lo. Daxmeh gig vaiq couh sij ndei faenh habdoengz he, gou youq baihgwnz nyinhcaen ciem aen coh gou.

Daj mwh caeuq daxmeh ciem habdoengz hwnj, gou moix ngoenz hwnjdangz cungj nyinhcaen dingq lauxsae gangjgoq, ma daengz ranz gienh saeh daih’it couh dwg sij cozyez, sij sat le swheij lij gag genjcaz baez ndeu,



mbouj caiq ngaizngaiz nyednyed lo. Gvaq ndwen he le, gou menhmenh fatyienh, gij hagsib yauliz gou beij gaxgonq daezsang lo, cingzcik hix hwnjbae lo. Yienghneix daxmeh couh ciuq habdoengz sij haenx hawj gou moix ngoenz hwnjvangj buenq diemj cung. Youq gwnz vangj, gou caeuq doengzhag doxcaez daujlun gij vwndiz hagsib caeuq gij saehyinx ndaw youzhi haenx, lij doxieik ngoenzsinghiz okbae guhcaemz, yienghneix hawj gij gwndaenj gou dem le haujlai saeh angq.

Miz mbaw habdoengz neix le, gou couh miz sibgvenq ndei hagsib lo, hagsib cingzcik hix daezsang lo, vanzlij cingqcingq dangqdangq ndaej hwnjvangj dem, caen dwg guh it ndaej song ha!

(sam nienzgaep Goh Yijdingz)

Gij Gyaetz Dijbauj

珍贵的爱

Cungh Siujgangh lauxsae dwg diyyuz lauxsae moq ban dou, hoeng gou di ndeu cungj mbouj gyaetz de.

“Dinglingling……” singlingz hwnjdangz yiengj lo.

“Ya, youh dwg goqdijyuz! Youh yaek yawjraen boux Cungh lauxsae haenx lo!”

“Lixcwngx, cauheiz! Lixcwngx, cauheiz!” Youh deng Cungh lauxsae lienh dou lo. Gou ceiq lau ndwncingq lo, ndwn nanz lai gou couh yaek ngunhlaemx ha.

It faen cung, song faen cung, sam faen cung……

Gou mbouj rox ndwn le geijlai nanz, gou roxnyinh gyaauj baez ngunh, baihnaj laeplat, laemx roengz lo.

Mwh moengjmoengj doengjdoengj, gou roxnyinh miz vunz umj dawz gou buet dwk. “Yi, neix dwg gizlawz?” Mwh gou singj gvaqdaej, cij fatyienh swheij youq ndaw yihyen, boux souj youq henz gou haenx gingqyienz dwg Cungh lauxsae.

Yawjyawj Cungh lauxsae, gou daejnga’nga lo.

“Ho, mwngz dauqdaej singj gvaqdaej lo, lwg huk neix, yawj mwngz yienghneix, lij gvaic gou ha?”

“Mbouj dwg ne, gou dwg gamjdoengh ndaej daej lo!”

“Gou hix naengz gamjdoengh vunz?” Cungh lauxsae gangj le, riuha ha lo.

Gou neix cij rox, henz ndang moix boux vunz, cungj miz haujlai “yienghgyaj”. Lumj gij gyaetz dijbauj, de ciengzciengz deng bau youq ndaw giz ceiq laeg, mbouj hawj mwngz yawjraen.

(sam nienzgaep Lij Yinzfungh)



Gyanghaet, gwnzmbwn mongmwtmwt, fwn laeglemx daeuj lo. “Sasasa……” singfwn youh sep youh sangj, raemxfwn lumj seingaenz nei daj gwnzmbwn mbin roengzdaej, yiemhranz lae roengz baenz baiz raemxndik, lumj liemzcaw gyaundeit. Raemxfwn doek youq gwnz go’nywj, couh bienqbaenz saek heuoic;

raemxfwn doek youq gwnz rin, couh bienzbaenz saek mongndaem; raemxfwn doek youq gwnz namh, couh bienqbaenz saek namhhenj; raemxfwn doek youq gwnzbiengz, couh bienqbaenz gak saek gak yiengh……raemxfwn caeuq diendeih yungz youq doxcaez, gij saek lai cungj lai yiengh haenx lumj youq ndaw raemxfwn laedoengh, lae haeuj ndawsim gou. Gij raemx neix swiq bae gij uq diendeih, sawj diendeih lai faenh seuqcengh he, lai faenh gyaundeit he. Fwn daeuj ndaej vaiq, bae hix ndaej vaiq. Mbouj rox seizlawz, fwn gaenq laeglemx byaij bae lo. Gyoengq roeg he youq gwnzmbwn gvaengxgva, lumj dwg doxlwnh dajcaemx gvaq le cwxcaih lai lo nei. Ndik fwn doeklaeng doek youq gyang fajfwngz gou, lumj yiengq gou cam ndei, hix lumj caeuq gou doxbiek……

(seiq nienzgaep Cungh Vanyij)